

欽  
定  
全  
唐  
文

欽定全唐文卷七十目錄

文宗二

授李固言崇文館大學士賈鍊集賢殿大學士制

貶李宗閔明州刺史制

貶李宗閔處州長史制

貶李宗閔潮州司戶制

授李石平章事制

授鄭處誨兼侍御史制

授李固言門下侍郎平章事制

授高承恭振武麟勝等軍節度使制

授陳夷行平章事制

封梁王休復等制

封皇第二男宗儉爲蔣王制

授楊嗣復李珣平章事制

授李石荆南節度使制

贈故齊王湊爲懷懿太子制

命訪長孫無忌裔孫制

授裴度中書令制

授崔鄆平章事制

立陳王成美爲皇太子制

授魏謩諫議大夫制

授賈島長江主簿制

收葬絳王詔

即位詔

貶張又新李續之詔

參酌儀制詔

停奏事監搜詔

以京畿旱宥囚徒詔

更定薦代例詔

討李同捷詔

貶熊望漳州司戶詔

欽定全唐文卷七十

文宗二

授李固言崇文館大學士賈餗集賢殿大學士制  
闡至業敷大化實賴於忠賢逐奸慝去黨比必資於正直  
非才推閒代道茂經邦則安能秉是鈞衡贊予鴻業朝散  
大夫守門下侍郎同中書門下平章事上柱國賜紫金魚  
袋李固言剛毅自任端嚴不回常懷疾惡之心每負佐時  
之業頃者奸雄蔽過私黨比連非爾固言孰開予意況面  
陳至懇章疏繼來辨虞卿宗閔之傾邪明蕭澣李漢之朋

附爰付大任益章器能勵乃公忠副予委遇朝議大夫守  
中書侍郎同中書門下平章事上柱國姑臧縣開國男食  
邑三百戶賜紫金魚袋賈餗抱忠與義秉直端誠文包經  
濟之方學達古人之奧自付以樞柄咨其謀猷瀝懇盡規  
夙夜匡補竭傳說之啟沃致山甫之將明而又舉善推賢  
孜孜匪懈苟利於國知無不爲惟嶽降神邦家永賴於戲  
貞觀之初共推房杜之德開元之際又稱姚宋之賢思得  
其人常勞寤寐但使固言樹讜直除四凶以肅清餗推至  
公披八元以輔弼關之邦家庶叶斯美是宜榮加書府之

職寵兼文館之任或監綜史氏以潤色大猷仍進崇階用  
獎忠孝勉服新命無替前勞固言可銀青光祿大夫崇文  
館大學士兼修國史錄可銀青光祿大夫充集賢殿大學  
士監修國史餘並如故主者施行

貶李宗閔明州刺史制

夫輔宰之任緝熙庶工苟或政紊彝倫跡涉黨比則何以  
執是邦柄毗予一人銀青光祿大夫守中書侍郎同中書  
門下平章事上柱國襄武縣開國侯食邑一千戶李宗閔  
頃以詞藝列於班行乃藉宗枝驟升顯貫朕嗣膺大寶夢



想勤勞謂其忠厚小心再委樞務每必造膝而問虛己以  
求將欲俾人不迷致我垂衣而理付之鈞軸斷然不疑而  
乃事每懷私言非納誨近者別登俊彥與之同列忌賢不  
悅物論誼譁翼贊之効蔑聞怨嫌之聲屢作前後叨位中  
外同辭惟進奔競之徒莫修恭慎之道蔽我卑聽擅我化  
權不思急召之恩都忘再擢之寵況且志無報主舉非正  
人顧其操心乃是速戾則何以式是百辟以維四方尚從  
屈法之典俾守遐藩之牧所謂全體良愧知臣可明州刺  
史仍馳驛赴任

貶李宗閔處州長史制

明州刺史李宗閔股肱之臣付以大政所宜竭節以答殊榮事或負予法所難貸雖欲終始其可得乎且細大之僣旣暴前詔而交通匪類蹤跡又彰豈可尚領方州牧我黎庶宜謫遐佐以肅朝倫可處州長史馳驛發遣

貶李宗閔潮州司戶制

交結凶邪叨取榮顯奸險陰慝因事盡彰頃爲吏部侍郎令沈蟻於內人宋若憲處密求宰相乃事跡敗露文字猶在閱視之際良深歎駭旣專樞柄益附私黨附下罔上廢

義滅公言多矯誣動挾欺詐傷風敗俗負我何深按之刑  
章法在無赦尚以早經任使賜以全生投之裔夷示我恩  
貸嗚呼知人則哲朕方自咎爲臣苟進當鑒於斯百爾君  
子宜體予意

授李石平章事制

朕嗣位君臨精求至道日慎一日於今十年期輔佐之臣  
爲我致理中立匪懈知無不爲今得其人果副僉屬朝議  
郎尚書戶部侍郎判度支上柱國賜紫金魚袋李石操履  
堅貞志業宏茂性合道要識通化源屢佐藩方備聞勲績

用司夕拜之任旋和尹正之榮爰委賦征備宣試效是宜  
擢膺輔弼俾勵政經爾當勤成務之規率致君之道內貞  
百度外靖四方參毗萬機課程庶績盡匪躬之節竭宣力  
之能大振朝綱兼司國計致億兆之富庶成方夏之乂安  
副予知臣勉茂休烈可朝議大夫守本官同中書門下平  
章事仍依前判度支勲賜如故

授鄭處誨兼侍御史制

御史中丞有翼上言曰御史府其屬三十八例以中臺郎  
稽參其事以重風憲如處誨族親胄貴能博文論義理無

不講求朝廷典章飽於聞見乞爲副貳以佐紀綱以爾處  
誨當居內廷草具密旨自以疾去於今惜之闕俞其言如  
我得闕有翼爲爾之知己予爲有翼之德鄰上下交舉豈  
有私受勉修職業所報非一

授李固言門下侍郎平章事制

自昔皇王之有天下也君非臣罔以濟其理臣遇君然後  
顯其才以調陰陽以承法度雖堯舜不能自聖雖臯夔不  
能自賢君臣相須今古同體余之夢卜實有慕焉檢校兵  
部尚書兼興元尹御史大夫山南西道節度管内觀察處

置等使李固言稟河洛之上靈孕乾坤之閒氣孤迥獨立  
公忠自持擅菁英之雄文洞旨要之奧學仁歸信厚動合  
典謨巖廊正人中外全德官業夙望殷乎華夷厯居大僚  
咸稱厥職乃者擢自輔相委之樞衡不依違以徇人每精  
恪以憂國匪躬而謇諤彌勵絕私而節操不渝洎仗鉞漢  
中頒我條詔端嚴以訓齊師律寬惠以綏撫蒸黎遂用徵  
還俾副公議召至宣室前席與言聽其誠詞皆臻理化是  
宜再參大柄正位黃樞爲朝廷之股肱聳縉紳之耳目康  
濟四海毗予一人是非罔及於愛憎任用必分其清濁有

犯無隱進思弼違無忝我知更光爾道可守門下侍郎同  
中書門下平章事

授高承恭振武麟勝等軍節度使制

門下寓縣乂安戎夷即敘雖亭障無虞於侵軼而卒乘難  
廢於訓齊況乎保固邊方控臨雜虜將付戎律是擇良才  
銀青光祿大夫檢校刑部尚書兼右執金吾衛大將軍御  
史大夫充右街使上柱國渤海郡開國公食邑三千戶高  
承恭昔爾先父勤勞王室式遏邊陲戡定庸蜀事存竹帛  
功銘鼎彝惟爾承恭克荷堂構學通奇正業擅機謀寬宏

得大將之風質厚有端人之操早升朝序累踐寵榮擁緹  
騎以邀巡勤彰夙夜建油幢以鎮撫績著公忠嗣乃家聲  
爲余爪士朕以單于舊地境接外蕃備紫塞之風烟屏黑  
山之寇盜是用錫以麾節俾作翰垣於戲張奐守節一作正

卻酋長之金鑠陳泰惟公緘豪右之寶貨遂得羌戎稽顙  
種落歸心行之非難勉企前哲罔違訓誡負我知人仍兼  
八座之崇式重三軍之任保茲終始懋乃嘉猷可檢校刑  
部尚書兼安北都護御史大夫充振武麟勝等軍州節度  
觀察處置等使散官勲封如故主者施行



授陳夷行平章事制

王者任賢能所以緝熙庶績舉正直期乎獻可弼違苟非  
懋茲四德何以光膺大任翰林學士將仕郎守尚書工部  
侍郎知制誥兼皇太子侍讀上騎都尉賜紫金魚袋陳夷  
行元精降靈厚載儲祉聚蓄英粹作時休祥懷道清貞執  
德謙茂行高嵩華宏包容之偉量明洞水鏡韜妍媸於默  
識貞己滋潔遇物能容雖牆岸孤峻而襟抱夷曠孝友爲  
修己之具文學誠潤身之餘衆推全才時號端士頃在郎  
署雅有名稱是用擢居禁密俾輔導元良論辨見賢人之

業教諭得名臣之體星琯屢改才術彌彰古稱旁求於夢  
卜曷若選之於言行是用付以政柄登於台階任茲鈞衡  
之重處以臯夔之秩人所注意予將仰成勉陳啟沃之規  
以副具瞻之望可守本官同中書門下平章事散官勲賜  
如故

### 封梁王休復等制

王者胙土畫疆封建子弟所以承衛帝室蕃茂本枝祖宗  
成式朕曷敢廢況天付正性夙奉至訓尊賢好善體仁由  
禮是可舉建侯之命膺分社之榮親親賢賢於是乎在敬

宗皇帝第二子休復第三子執中第四子揚言第六子成  
美皆氣蘊冲和行推敬慎游泳墳索佩服師言宜開土宇  
之封用申睦族之典休復可封梁王執中可封襄王揚言  
可封紀王成美可封陳王宜令有司擇日備禮冊命

封皇第二男宗儉爲蔣王制

周宅土中藩衛並建漢有天下子弟畢封朕承列聖之鴻  
構託於兆人之上順考古道用保乂於皇家第二男宗儉  
孝友齊莊恭肅明懿蹈師氏之典訓佩古人之格言動必  
有程雅不好弄遵道誠資於積習樂善實本於生知洪量

不矜芳猷自穆是宜光分茅社作我藩翰式發麟趾之祥  
欽若犬牙之制爰舉成命錫其寵章可封蔣王仍命有司  
備禮冊命

授楊嗣復李珣平章事制

運行帝載翊贊天工必俟輔臣以宣至化將益秉鈞之重  
是資並命之求諸道鹽鐵轉運等使正議大夫守戶部侍  
郎上柱國宏農郡開國伯食邑七百戶賜紫金魚袋楊嗣  
復動必居正言惟在公峻若孤山清猶止水從政稟詩書  
之教承家達禮樂之源朝議郎守尚書戶部侍郎判戶部

事上柱國賜紫金魚袋李珣質本溫明才推俊茂智能周  
物宏本有容守和爲君子之儒可大見賢人之業挺爲國  
傑秀稟元精生必爲時寶稱希代便蕃清秩操履有常調  
黃鐘而協諧和朱弦而疏越或總戎重鎮或敷惠字人卒  
乘有輯睦之功惇嫠著昭蘇之詠洎入司邦賦爰掌版圖  
事未財成公望猶鬱是可以宰領樞務用弼予違敘彝倫  
而建大中罄訐謨而調元氣又寧華夏保合神人宜申補  
袞之規致我垂衣之理於戲孔明相鼎峙之國尚聞魚水  
之詞夷吾輔霸業之君猶致鴻翼之喻矧予祇荷丕構雖

未克紹前修造次之間不忘遵道宵衣旰食一紀於茲災  
沴尚生於旱蝗黎元屢困於衣食中夜靜慮若涉大川將  
求津涯俟爾而濟爾謂是靡以拂吾心而不行爾謂非靡  
以徇吾志而苟用開物成務俾乂於得時求賢審官寧我  
以多士則魚水鴻翼夫何足言勉副簡求無忝我休命嗣  
復可守本官同中書門下平章事依前充諸道鹽鐵轉運  
使勲賜如故珏可守本官同中書門下平章事依前判戶  
部事散官勲賜如故

授李石荆南節度使制

翼亮之臣寄任攸重九功未敘則宜立於廟堂百度旣貞則兼制於方嶽中外迭處式寵才賢銀青光祿大夫守中書侍郎同中書門下平章事充集賢殿大學士上柱國李石元精降祥河嶽鍾秀文含大雅學茂全經瞻智通理亂之源達識究古今之變望鬱人傑居爲國楨頃者嘉其多能俾調鼎實動必循道知無不爲每竭慮於謀猷思致于於堯舜嘗司轉漕仍總征財盤錯之難錐刀不滯增台輝之光彩揚鳳沼之波瀾墜典咸修遠方畢服夙夜匪懈光我知臣近者情在進賢願辭袞職誠不易奪朕所難違乃

眷荆門東南巨鎮山川重險舟車要衝比罷節符是遵權  
便台臣往涖宜復前規俾登大將之壇仍持上相之印尹  
正望府兼視雄藩增榮峻階無忝朕命可中書侍郎同中  
書門下平章事兼江陵尹充荆南節度管内觀察處置等  
使勲如故

贈故齊王湊爲懷懿太子制

褒善飾終王者常典況我友于之愛手足之親永言痛悼  
之懷用錫元良之命故齊王湊孕靈天宇擢秀本枝孝敬  
知於孩提惠和洽於親愛將固磐石遂分茅社學探蟻術



之精智有象舟之妙好書樂善造次不失其清規置醴尊  
師風雨不忘其至敬方期鮐耆以保怡怡天胡不仁殲我  
同氣念周宣好愛之分長慟莫追覽魏文榮樂之言軫懷  
無已繇是稽諸前典式展追榮特峻彝章表恩泉壤雖禮  
命之儀則爾而天倫之恨何據遐想幽魂宜膺寵數可贈  
懷懿太子有司擇日冊命

命訪長孫無忌裔孫制

朕每覽國史見太尉無忌之事未嘗不廢卷咨嘆遐想其  
人訪其裔孫用申甄獎

授裴度中書令制

緝熙柄政亮采皇猷宏道德而輔昌圖調陰陽而平景緯  
我惟求舊人亦與能正位台階實資元老河東節度觀察  
處置等使開府儀同三司守司徒兼中書令太原尹北都  
留守上柱國晉國公食邑三千戶實封三百戶裴度星辰  
稟秀山嶽炳靈文蔚采章量包江海負經邦之遠略懷許  
國之明誠研幾而識洞著龜運籌而道光竹帛風雨一致  
儀刑四朝萬方所瞻百辟爲憲洎揚旌鴈塞建節龍山謹  
管籥而戎索烟清壯襟帶而軍牙氣肅虜絕南牧聲雄北

門懿茲殊庸予所嘉歎是用專授衡軸俾清化源統和神  
人茂育區夏夫宰相之任作予股肱外可以懷柔四夷內  
可以親附百姓大可以贊亭毒阜生成小可以激貪廉正  
雅俗爾有休躅予不重言至於玉立巖廊風行號令端若  
植表爲時指南開予曾襟廣我視聽實賴人傑代茲天工  
爰罷麾幢再操舟楫庶展乞言之禮豈唯論道之尊佇竭  
訐謨無忝毗倚可守司徒兼中書令散官勲封如故

授崔鄆平章事制

朕丕承寶圖思臻古理小大之政皆倚輔臣選衆攸難得

人而授中大夫守太常卿上柱國賜紫金魚袋崔鄆天資  
正性嶽降瓌材慎楊震之四知邁臯陶之九德抱負直質  
秀發英華動必蹈中言皆體要聚學每探於精蹟馳騁九  
流摛文若奏乎笙簧抑揚三代鴻量難挹懿聲自高乃者  
入典訓詞出司俊造能用周密靡混妍媸銓總以明允爲  
先廉察以澄清爲重嘗踐其職顯有休功秩宗之選方登  
公台之論彌鬱繇是酌其望實付以鈞衡恢予之規模廣  
予之耳目於戲宰相之任弼諧是資予欲使六氣均調惟  
爾贊予欲使萬方平乂惟爾謨予欲使臣寮得職惟爾諧

予欲使邪正不亂惟爾翼言罔慮於咈耳進無忘於汰心  
貞觀開元之法度俱存房魏姚宋之規猷盡在咨爾丞相  
舉而行之可守本官同中書門下平章事散官勲封如故

立陳王成美爲皇太子制

門下古先哲王之有天下也何嘗不正國本而承天序建  
儲貳而主重器朕以寡昧祇荷丕圖虔恭寅畏思固鴻業  
慎擇令懿曠於旬時而卿士獻謀龜筮告吉以爲少陽虛  
位願舉盛儀列聖垂休俾合予志選賢而立式表無私敬  
宗皇帝第六男陳王成美天假忠孝日新道德溫文合雅

謙敬保和裕端明之體度尚詩書之辭訓言皆中禮行不  
違仁是可以訓考舊章欽若成命授之七鬯以奉粢盛宜  
迴朱邱之榮俾踐青宮之重可立爲皇太子宜令所司擇  
日備禮冊命

授魏謩諫議大夫制

朕以邦國之大機務之多惠有所未周化有所未洽不有  
忠讜之士左右輔益逮暗無燭不其難歟今即高選正人  
俾居諫省朝政闕失期乎必聞是用簡自朕心特申獎命  
所期稱職豈限常資可諫議大夫仍兼起居充職

授賈島長江主簿制

比者禮部奏卿風狂遂且養疾關外今却攜卷軸潛至京城遇朕微行聞卿諷詠觀其志業可謂屈人是用顯我特恩賜卿墨制宜從短簿別俟殊科

收葬絳王詔

叔父絳王爲逆賊等援立竊窺大位旣無討賊之意遂使忠義銜冤及王師擒妖義旅問罪前驅勇氣以致殲殂伏以太皇后慈仁思以慰解宜令有司量事收葬申恩討賊刑禮之中示於四方以明朕意

即位詔

君天下者莫尚乎崇澹泊子困窮遵道以端本推誠而達  
下故聖祖之誠以慈儉爲寶大易明訓垂簡易之文未有  
上約而下不豐欲寡而求不給朕以眇薄遭逢內難刷君  
父之仇恥摠億兆之哀冤而股肱大臣羣卿庶士引義抗  
請至於再三以圖宗社之安以答華夷之望俯從衆欲夙  
夜震兢思所以克己復禮修政安人宵興匪寧旰食勞慮  
夫儉過則酌之以禮文勝則矯之以質庶乎俗登太古道  
洽生靈儀刑邦家以化天下內庭宮人非職掌者放三千



人任從所通長春宮見在斛斛及絲草席等依前戶部收  
管鄆縣漢陂鳳翔府駱谷地還府縣教坊樂官翰林待詔  
伎術官并總監諸色職事中冗員者共一千二百七十人  
並宜停廢總監中一百二十四人先屬諸軍並各歸本司  
餘七百三人勒納牒身放歸本管先供教坊衣糧一百分  
廂家及諸司新加衣糧三千分並宜停給應緣田獵鷹雞  
獸犬等並宜放除五坊加配諸道鷹鷄等長慶以來常進  
外宣索自今已後一切停進其須備蒐狩量留者宜準憲  
宗朝故事其今年新宣附食度支衣糧小兒一百人並宜

停罷應別詔宣索纂組雕鏤不在常貢內者並停度支鹽鐵戶部及州府百司應供宮禁年支一物以上並準貞元額爲定度支檢勘其元和以來加配合停色數二十日內分析聞奏先造供禁中牀榻以金飾瑟瑟雜寶鈿珍珠瑪瑙裝者悉宜停進東頭御馬坊毬場並却還左龍武軍其殿及亭子令所司拆毀餘舍並賜龍武軍收管應行從處張設不得用花蠟結綵華飾今年已來諸道所進音聲女人各賜束帛放還本道應城外墳墓先有開劖道路以備行幸處宜令兩軍及府縣曉示百姓任其修塞其大逆魁

首蘇佐明王嘉憲石定寬閭惟直及因兇賊姦計遂與同謀人劉克明田務成許文端等汙瀦無赦梟首無論已處斬訖家並籍沒妖妄僧惟真道士趙歸真等或假於卜筮或託以醫方疑衆挾姦矯誣干禁並從流竄以靖京師其情非姦謀迹涉註誤者自今已後一切不問兇徒旣殄寰宇佇康載舉令猷用宏庶績於戲昔漢文顧十室之產而天下乂安我太宗皇帝勤四海之理而帝業隆盛暨乎列聖罔不承式而歲代滋久訛弊以生仍屬艱故未遑改作朕祗荷重器思臻大寧將正躬以立訓爰取新而革故咨

爾百辟卿士外服侯衛其喻朕意永堅乃心無縱欲而敗  
度自底身於不類率是教典用交修焉布告中外咸使知  
悉

貶張又新李續之詔

朕在億兆人之上不令而人化不言而人信者法也法行  
則君主重法廢則朝廷輕田伾常挂亡命之章倫請養賢  
之祿迹在搜捕公行人閒而更冒選吏曹顯擬郡佐及黃  
樞覆驗烏府追擒證逮皆明姦狀盡得三移憲牒一無申  
陳衆狀滿前羣議溢耳終則步健不至銀鐺空來蔑視紀

綱頗同侮謔顧茲參畫負我上台閱視連名伊爾二子又  
新可汀州刺史續之可涪州刺史

參酌儀制詔

衣服車乘器用宮室侈儉之制近日頗差宜付所司並準  
儀制令依品秩勲勞仍約今時所宜撰等級送中書門下  
參酌奏聞

停奏事監搜詔

元首股肱君臣象類義深同體理在坦懷夫任則不疑疑  
則不任然自魏晉以降參用霸制虛儀搜索因習尚存朕

方推表大信置人心腹庶使諸侯方嶽鼓洽道化夷貊飛走暢泳治功況吾台宰又何閒焉自今以後紫宸坐朝衆僚既退宰臣復進奏事其監搜宜停

以京畿旱宥囚徒詔

朕聞動人以行不以言應天以實不以文蓋明誠者感通之大本也刑德者陰陽之大倫也故五事陳於洪範時令著於禮經雖堯湯之災或丁於天數而休咎之萌必徵乎人事朕祗荷大統子視兆人宵衣旻食不敢自逸猶慮上心不達於下下志不通於上是以正朝廷聽便殿訪求事

之益者罔不行弊之壅者罔不去庶乎交感以致洽和而誠有所未臻信有所未達自春及夏亢陽爲害雖麥秋大稔而禾歲未登京畿之閒陰陽小爽齋禱備至膏澤未濡中心惻然思所以濟豈庶獄之未孚將一夫之不獲永用惕戒載懷哀矜其京畿見禁囚徒犯死罪非故殺人者並降流流已下罪遞減一等依令有司約禮禱祠宗廟徧祈山川務盡莊敬以副予志百司庶務有不便於人者各委長吏悉心陳列無使壅於上聞其實歷二年十二月二十七日勅及今年二月十二日赦條所釐革施行未畢者宜

令中書門下速舉處分朕志唯克己誠在恤人自臨御以來躬行不逮乃者永虞艱食瞻仰昭回幽禱移災蔬食逾月益罷浮費用嚴天譴尚懼明有未燭道有未宣聞於神者無馨香施於理者或繆戾終夕三省履冰在懷內外鄉士有規朕以道宜封事條奏宰衡庶尹侯衛守長各勵乃職庶承於天休

更定薦代例詔

諸道諸軍使應奏判官并每年冬薦等所奏判官除新開幕府擬員闕置署外其向後奏請如是元闕即云官某職



今奏某人充如已有今更奏即云某職某人緣某事停奏  
某人替具前使下臺省官合冬薦者除府使罷外既有薦  
用當且要籍豈合數月之閒便稱去職自今已後如帶職  
掌授臺省未經兩考者不在冬薦限如其中實有事故其  
他官據品秩合冬薦者則依元勅

討李同捷詔

王者之御天下也推其至誠格以大順臣子之奉君父也  
効以奔走竭其忠貞故能上下交感家邦用寧其有專上  
周旋干紀悖戾怠棄彝典矯誣當時固人神之所不容古

今未能赦者也朕以菲德祇荷鴻業將躋俗於至厚之域  
致人於無過之地永用勞慮惻然疚懷李同捷幸席舊勲  
不思績緒斬麻未幾私行墨纒毒殺忠良擾惑部校稽之  
國憲難逭常刑朕以頃在先朝已稽中旨實遵成命未議  
改圖庶乎舞階以服有苗因壘而降崇國使臣旁午優詔  
指明而又越留務之權授之戎帥拔負海之地置之中華  
推恩含垢斯亦至矣而同捷益懷迷執閉境練兵大詬鄰  
封拒捍中使遐邇憤怒中外驚嗟叛命旣彰大義當絕事  
非獲已良用憮然其李同捷在身官爵並削奪朕以滄景

之地兇魁竊據今若怒茲小醜遽至大刑慮金革一揮玉  
石同碎弔人之義深置未安宜令四面節度使各蓄兵鋒  
共固疆守絕其窺伺之路撫其離叛之人嚴戈矛之備以  
待其窮據山川之要以張我武如叛徒驚擾潛有侵軼當  
隨機禦遏以自保完勿使凌犯爲虞隄防或弛其滄景將  
士如有能奮揚忠義執戮渠魁者先是六品已下官者便  
授三品正員官其先是五品已上官者節級超獎仍賜莊  
宅各一區錢二萬貫文並列加寵任如能率所管兵馬以  
州郡來降者超三資與官便授岳牧賜錢一萬貫以城鎮

來降者超兩資與官仍賜錢五千貫以一身降者亦與改  
轉仍賜錢帛其同捷如能知義悔過束身歸朝並與洗雪  
仍加寵獎若不能悛悟自取誅夷罪止一身其餘脅汙一  
切不問於戲佳兵者聖祖之所誠文德者前哲之所崇肆  
予寡昧敢忘丕訓然以齊庶方者號令立人紀者君臣斯  
制苟渝大倫安設是用絕其奔軼誠以申嚴佇無戰於文  
告庶有瘳於迷復特此來遠諒非初心布告內外咸使知  
悉

貶熊望漳州司戶詔

欽定全唐文

卷七十 文宗

孔門高懸百行由至順者其身必榮朝廷廣設衆官踐正途者其道必達前鄉貢進士熊望因緣薄技偷冀褻幸營居中之密職擾惑朝經鼓偏下之囂聲因依邪隙及衆議波湧累月不寧司門驗繻累月至四考覆謬妄乃非坦途朕大啟康莊以端羣望俾示投荒之典用正向方之流可  
漳州司戶

欽定全唐文卷七十一目錄

新文藝出版社藏書

文宗三

太尉段秀實祔廟詔

試制舉人詔

委中書門下處分制科及第人詔

追贈晉王普爲悼懷太子詔

賑山東水災詔

更定權知同正授六考詔

絕王庭湊進奉詔

討王庭湊詔

贈藥濛尚書詔

授魏徵孫可則等官詔

封王智興等詔

追錄故中書令褚遂良等裔孫詔

委京兆捕賊詔

禁奏祥瑞詔

貶柏耆等詔

令鎮州行營兵馬各守疆界詔

雪王庭湊詔

諭刺史詔

授溫造山南西道節度等使詔

答路隨等上憲宗實錄詔

崇儉詔

令御史疏決繫囚詔

禁弋獵傷田苗詔

糾舉滯獄詔

加裴度司徒詔



答裴度奏辭冊禮詔

令神策軍與府縣協捕寇賊詔

勅禮部侍郎高錡試宗正寺解送人詔

欽定全唐文卷七十一

文宗三

太尉段秀實祔廟詔

秀實忠衛宗社功配廟食義風所激千載凜然開代勲力  
須異等夷宜賜綾絹五百匹以度支物充仍令所司供少  
牢并給鹵簿人夫兼太常博士一人檢校

試制舉人詔

志本於道蓋道以致君爲先代實生才蓋才以濟理爲務  
不索何以獲其實不言何以知其志故帝堯垂詢衆之訓

殷宗首沃心之術其傳曰嘉言罔攸伏又曰俊人用章漢  
魏以還詔策時作暨於我唐遵爲故事繇是善政惟乂魁  
能閒出朕祗荷大寶勤恤兆人明不燭於幽暗惠未流於  
鰥寡御朽兢慮求賢永圖是以詔命有司會羣材列稽疑  
延問闕政子大夫達學通識儼然來思操觚濡翰條誨宿  
滯慰我虛佇必宏嘉猷故臨軒命書策以審訪繼燭俟奏  
其悉乃辭各宜坐食食畢就試左散騎常侍馮宿太常少  
卿賈餗庫部郎中龐嚴宜並充考制策官

委中書門下處分制科及第人詔

王者謹天戒酌人言叶時凝命資賢贊理斯爲令典也朕以菲德祇膺大統歲屬凶旱人思厖寧庶察弊以勤理因舉能而詢衆科別條問臨軒致誠載搜尤才果副虛佇賢良方正能直言極諫科舉人第三等裴休裴素第三次等李邵第四等南卓李甘杜牧馬植鄭亞崔璵第四次等崔儼王式羅紹京崔渠崔慎由苗愔韋昶崔搏第五次等崔渙韓賓詳閑吏理達於教化科舉人第四次等宋昆軍謀宏遠堪任將帥科舉人第四次等鄭冠李栻等皆直躬遵道博古知微敷其遠猷志在宏益實能攻朕闕紹政經究

天人交際之理極皇王通變之義指切精洽粲然可觀旣校才於試可宜旌能於受祿其第三等第三次等人委中書門下優與處分第四次等第五上等人中書門下即與處分

追贈晉王普爲悼懷太子詔

王者重統紀尊儲兩所以上嚴國本祇叶禮經睦人倫以正邦典崇丕基而昭彝式其或德契元良恩當追命道雖閒於存歿義有表於哀榮仰惟舊章用攄憫志故開府儀同三司晉王普先帝冢嗣閒氣夙鍾孝敬發於岐嶷溫仁

形於襁緥翦珪分社光祝冊於參墟錫土啟藩假威尊於  
上黨朕頃戡內難謬屬與能以王齒在嬰提事絕推讓方  
期就傳謂致修齡旣因猶子之義俾膺主鬯之選天不憖  
遺殲我本枝泣悼永往空餘典禮嗟樂善而莫報顧十起  
而何追銜悲良慟此誠無極是用稽諸前訓申我宿愛布  
曩懷於此日告如在於幽靈式備虛儀曷瘳深痛可贈悼  
懷太子仍令有司擇日備禮追冊

賑山東水災詔

朕撫有四方子育兆庶虔恭夕惕罔敢自暇庶乎天地交

感人神洽和如聞山東降災淫雨泛濫豈政理有所未明  
人情有所未達邪中宵待旦惕然疚懷應是諸州遭水損  
田苗壞廬舍處宜委所在吏切加訪恤如不能自濟者宜  
發義倉賑給普令均一以副朕懷

更定權知同正授六考詔

凡權知授官皆緣本資稍優未合便得藉才擢用故且權  
知若通計五考即便同正授極爲僥倖自今已後應諸州  
府五品長馬權知正授通計六考滿停其勒留官如有未  
滿六考停給課料者便準此卻與支給

絕王庭湊進奉詔

朕初撫天下實在便安故委同捷節旄處以華壤顧彼童孽豈宜當之然蔑棄君親不合容覆忠臣義士咸同忿嫉非朕生事至於興戎鎮州王庭湊承累朝恩榮據四郡士衆將爲率先問罪以圖策勲而乃影援逆寇干犯王旅諸道使命繫爲纍囚內兵滄州抗戰四境交支郡之管籥棄鄰好之姻親無恩於家忘義於國而猶特遣中使許其轉禍詞旨堅執曾無少悛近日又令宰臣遺書許以效順王誥一去寂爾無聞朕以成德一軍代建勲力聆風拭目待



之實殊豈爲庭湊一人致使傷及百姓今迫藩臣懇請連章繼來朕猶不能獨斷宣示羣公卿士參詳可否以觀衆情義不容誅列狀斯在今亦酌其簡便以適事機亦以嘗在先朝曾效忠慤寵獎逾等驟至三公開其自新以全臣節朕之恩義亦不負矣其諸道與鎮州鄰接處宜並絕其進奉嚴加警備其有突犯及隨指揮併合宜依詔旨處分諸道須有移軍出界並不得焚燒廬舍橫加殘害歸投者撫之拒命者禦之如有忠臣義士以一州或城鎮降者並依討滄州例處分其上都進奏院宜令御史臺京兆府切

加守捉禁其出入待後勅處分如庭湊翻然改悔乞效忠  
勲上表陳誠須有聞奏亦委鄰界當時轉與進上不得停  
留於戲朕示帝王至仁以安兆庶以黃老清淨用寧寰宇  
文誥屢施而不從兵革在郊而未弭德不能洽誠有未孚  
致此費辭良多愧歎

討王庭湊詔

門下雷霆雪霜上天所以成物明罰勅法聖人垂之易象  
豈陽春不可以獨化將輔理固在於威刑乎則遏亂禁非  
法天齊俗諒有爲而然也何則三綱五常王化之正本彰

善瘳惡國經之大防君人者苟不提此柄以示天下是納人於陷穽道俗於豺狼而欲家固人安上和下順猶北轅而適楚也李同捷罪暴寰宇告之則悖寵之益凌亂君臣父子之紀綱棄覆育生成之恩義則綏討之命蓋不得已焉而王庭湊爲我藩臣久膺寵命致爵位於擾叛之際齊恩澤於忠義之倫贖過圖功宜百羣帥而首扇同捷使起自墨纒黨惡之心劇於虎兕負德之醜逾於梟獍驅忠義之旅以授兇渠率悅順之人以侵鄰壤藩方統帥飛䟽互來朝右公卿懇章繼奏皆期鳴鼓問罪奮戈啟行朕道希

包荒志在含垢多端曲護大開坦途諭之使致奇功告之  
將酬重位顯招密示抑義降心繼馳信臣累諭深旨而傲  
很彌甚凶肆不悛飾惡言於布章資盜糧於狡寇拘四鄰  
忠告之使堅一境代襲之謀與逆豎爲輔車絕舊歡於姻  
好屢有降卒備驗奸蹤潛軍入援德棣縱燎以焚瀛莫河  
東易定被毒騷然憲誠從諫見侵相繼加以猜戮無辜安  
忍逞欲有族坑屋誅之令極削下僭上之圖井邑銜冤道  
路以目自頃冀其迷復未議加刑但令閉境猶希補過而  
乃大舉將卒期覆定州取怒人祇迎風瓦解稔慝構亂前

古罕見若尚爲包容則孰分逆順其王庭湊在身官爵並宜削奪應諸道州鎮接界處各宜逐便攻討其鎮州將士如有梟斬王庭湊者先是六品以下官者便授三品正員官其先是五品以上官者節級超獎仍賜莊田各一區錢二萬貫兼授以土地及賜實封如有能率所管兵馬以州郡來降者超三資與官仍便正授刺史賜錢一萬貫以城鎮來降者超兩資與官仍賜錢五千貫如先未有官者即特授三品四品官如以一身降者亦與改轉仍賜錢帛其諸道將士有因立功能梟斬王庭湊者亦準前例處分成

德一軍山東所賴扼制徑險控東河防武俊之拯橫流承  
元之變舊俗言念誠節何日可忘知感弟兄見劫妻子爲  
質愍惻之志朝夕在懷當無疑謀自致恩外昔光武存大  
信而捨朱鮪魏祖推至誠而納張繡非無故事朕不食言  
如庭湊自能束身歸朝並與洗雪若執迷安禍罪止其身  
其餘脅汙一切不問縱有跡涉逆節事出一時劫於凶威  
並從寬宥四州之內如有謀爲向順屈於垂成家族無辜  
殘酷所及者宜優加追贈并賜錢帛其有子孫得脫免委  
四面節度切加搜訪當議與官四州管內百姓久困冤害

橫罹挾制念同赤子莫匪吾人諸軍所次不得妄加殺戮  
并焚熱廬舍暴掠財產及有拘繫以爲纍囚四州百姓久  
廢生業如有歸投各宜存撫老幼丁壯量加優恤仍給與  
空閒田宅使之如歸事平之後願還本貫亦聽於戲原野  
陳師雖前王之不免干戈屢動諒菲德之所興孤我宿尚  
良深撫然咨爾輔弼之臣暨於藩守羣帥爾尚悉乃忠力  
匡予寡昧經遠猷以端理本恢上略以速戎功緝庶政以  
康中邦明大教以昭昧俗宣示內外俾知朕懷

贈藥濛尚書詔

見危致命之死不顧據其義則白刃可蹈得其所則鴻毛  
猶輕此忠臣烈士所以垂名不朽者也故棣州刺史充本  
州鎮遏兵馬使藥濛稟受正氣發揮壯猷屬逆豎亂常反  
形潛具濛於此時密獻成算朕且欲諭以文告革其非心  
重難興師因寢其奏而沈謀中泄構茲深冤眷言此心傷  
恨何已可贈工部尚書仍許歸葬上都令所在路次州縣  
供熟食兼遞夫等應緣葬事所須並令官給賊平之後仍  
訪其子孫親屬

授魏徵孫可則等官詔



武德已來輔相之臣以道致君以勞定國若贈司空徵故侍中知古贈太尉冕語其功次皆在第一清風餘祉宜及乎後昆爾等乃其曾孫式叶搜獎俾奉貽謀之慶用覃延賞之恩各命以官勉思祖德

封王智興等詔

王者誅暴亂賞勲勞旣正紀綱式頒爵位朕以菲德理乖勝殘使釁生誨盜刑用戎鉞屬者庭湊用滄州爲輔車以謀專土同捷恃棣州爲屏捍遂成阻命實賴英帥共恢壯圖爰議酬庸式獎宣力武寧軍節度使徐泗濠等州觀察

處置等使充滄德行營招撫使光祿大夫守司徒中書門  
下平章事上柱國太原郡開國公食邑二百戶王智興可  
特進封代國公食邑三千戶餘如故平盧軍節度使淄青  
登萊棣等州觀察處置等使兼押新羅渤海兩蕃等使銀  
青光祿大夫檢校尚書僕射御史大夫上柱國會稽縣開  
國公食邑一千戶康志睦可檢校尚書左僕射餘如故正  
議大夫檢校工部尚書使持節鄆州諸軍事兼鄆州刺史  
御史大夫賜紫金魚袋崔宏禮可檢校尚書右僕射餘如  
故其棣州城下武寧軍節度使諸道立功將士已甄錄外

委智興條䟽聞奏棣州應見在百姓宜復一年其將士有  
決戰攻壘奮不顧身中刃被瘡遂成廢疾者並賜衣糧終  
身勿絕其武寧軍及平盧軍浙西宣歙天平等五處兵馬  
在棣州城下者並宜放歸本道於戲並命申威分疆翦寇  
界大河之南北委藩守以廓清立績者旣以勞施圖功者  
方期盡敵勉宏勝策無至老師共臻輯寧副我勤屬

追錄故中書令褚遂良等裔孫詔

朕詳觀列聖紀冊祖宗盛業粲然在前或道有污崇政有  
善否未始不繫乎當時輔弼常因便殿言諸宰臣勉其匡

益叶心推戴且以去歲乙巳登應門敷大號俾疇賢相以  
訪遺裔或血食不繼宗祊已蕪如遂良之委笏面諍名垂  
史書仁傑之恢復廟社事形先覺宋璟之文吏骨鯁功參  
理平元紘之守規畫一時成有裕其胄僅存不絕若髮各  
授邑吏使其自試其故中書令褚遂良五代孫虔可汝州  
臨汝縣尉內史狄仁傑曾孫元封懷州修武縣尉侍中宋  
璟曾孫澈岳州沅江縣尉中書侍郎李元紘曾孫伉鄧州  
向城縣尉

委京兆捕賊詔

輦轂之下法在肅清姦盜竊發理難容舍親仁坊今月五日賊依前委京兆府左右街使鳳翔邠涇金商同華等州切加捕逐如獲頭首準法科斷其餘支黨一切不問於戲唯此凶災是彰非德情敢忘於罪己惠所貴於及人施令布和期於蘇息凡厥臣庶宜體朕懷主者施行

禁奏祥瑞詔

朕以菲德祗膺大寶深求理本將致時雍以慈惠恭儉爲休徵以人和年豐爲上瑞夙夜思省無以過之至於嘉穎連理之祥飛禽走獸之異出於邦國來獻闕庭虛美推功

非予所尚歲晏奉陳於清廟元正列上於大朝探討古今  
亦無明據恭惟靈聖豈俟薦聞事非經通理當釐正庶使  
溥天之下知予務實之心其諸應有三等祥瑞並不得更  
有聞奏亦不要申牒所司其臘饗太廟薦獻太清宮并元  
日受朝奏祥瑞儀主宜停

貶柏耆等詔

頃以德州未下俾宣朝旨慰勉勤瘁詢謀事機計日指程  
候其速達而所至留滯請兵自隨假勢張皇乘險縱恣奏  
報蔑聞擅入滄州專殺大將捕置逆校潛送兇渠物議紛

然遠近駭聽滄德宣慰使諫議大夫柏耆可貶循州司戶參軍判官殿中侍御史沈亞之可虔州南康縣尉

令鎮州行營兵馬各守疆界詔

門下聖人之教先德後刑王者之師有征無戰所以體人經遠要終貴實導利天下端由一人情雖獲已務臻斯道朕以寡昧嗣守丕業威不能禁暴叛戢干戈德不能濟生靈完物力以至於起師戎之役陳原野之刑然謂有功固以多愧始者逆賊李同捷統戎專地弄兵恃寵不受文告不服朝廷本貴清淨惟務含宏常欲安其反側匿其瑕穢

曾不悔禍是用徂征賴天地降靈中外叶力兇渠就戮滄  
海甫安我本興師事止於此言念士衆以及里閭並遭脅  
從久陷塗炭殺傷之外殘瘝可哀已各有獎錄及令賑恤  
仍委長吏更加綏輯王庭湊因緣同捷遂此沈迷及交鋒  
刃益縱豺豕今滄德旣已平殄庭湊猶未悛懲合乘兵威  
便圖攻討然欲更令思省未忍重有傷殘又以行營諸軍  
久勞於外憫其暴露且議旋歸況兵有可用而不用謂之  
不武則失柄有不假用而用謂之黷武則興亂弛張在我  
豈止一途其鎮州四面行營兵馬並宜各歸本界且自休



息使耕農不廢儲峙有常見存者苟獲阜安未來者亦將  
焉往朕志已定姑務保寧諸道縱有能指期攻取鎮州者  
亦非朕意何者庭湊一身負累三軍百姓皆是吾人豈忍  
非辜罹其殺害朕爲父母義切生成每念迫以兇威不得  
保其性命或使役夫遠念家業或割剝資糧或朝夕不免  
於饑寒或冤濫以致其愁痛寢食之際未嘗暫安其幽州  
河東易定齊德昭義魏博等道但要保境勿相往來若庭  
湊以四郡之地三軍之衆率誠歸闕翻然效順則不獨棄  
其舊惡兼亦別議新恩以至自知計力窮盡而能束身請

命亦當待以不死惟此一事與達表章其餘並勿聽信鎮州四面節將或功勲已茂或感憤方深皆欲乘時以圖盡敵然國家之本愛人爲先縱能翦平豈免傷殺今但環境設備使之不能侵軼須以歲月自當誅除此所謂不戰之功不勞而定也其應討滄州行營將士並已遣使各加賜勞其死事之後傷痍之人及濱河州縣兵戈所聚水潦爲敗者並有制命令悉惠養優恤副我意焉然猶慮長吏未能將明或有漏落委中書門下準五月十三日勅詢訪事實務令周給於戲我理天下但恐道化未至不慮寇孽不

平若宗社之靈風教所及則四夷八蠻猶當梯山航海慕  
化而來豈山東四郡獨能拒命夫退修教而降崇不戮人  
而克敵予之所尚今也其時凡在中外庶僚羣帥悉力竭  
忠尚弼予理宣示遐邇各體朕懷主者施行

雪王庭湊詔

帝王之御大器也上法天意下順人情何嘗不欲舞干羽  
以致懷來滌舊垢而宏惠貸朕以寡昧獲守昌圖享二百  
餘年之丕基纂十三列聖之洪業而涉道猶淺燭理不昭  
德未洽於生靈信未孚於微隱至使河朔殘梗藩臣阻絕

既多在予之責每軫納隍之念頃者滄州拒命將帥專征  
有國彝章非朕敢赦諒功成於九伐當事止於一方況成  
德本軍早列勲籍庭湊初意亦獻嘉謀因緣細隙互構隙  
闕且聞朝廷則挂刑書雖欲上陳固難自達及滄德翦定  
甲兵偃戢拜章辨數納款鄰封爰妄疑台臣俾通王命備  
聞恭惕延望私恩感激而情動三軍歡呼而聲馳四郡朕  
猥居兆人之上常懼一物失所雖外示君臣之義實內猶  
父子之親豈可使覆載之中不沾雨露照臨之下獨隔輝  
光斷自予衷靡聽輿議既改之而不恡則待之而如初俾

服官榮載膺寄任爵服盡在恩禮用加其王庭湊可依前  
授金紫光祿大夫檢校司徒兼鎮州大都督府長史御史  
大夫上柱國太原郡開國公食邑二千戶充成德軍節度  
鎮冀深趙等州觀察處置等使於戲天道之所助者曰順  
人倫之所重者曰忠爲君在於不疑爲臣在於不貳然後  
上下交暢以底泰寧當宏令猷勉收來效凡百卿士宜體  
朕懷

諭刺史詔

刺史分憂得以專達事有違法觀察使然後奏聞如聞州

司常務巨細所裁官吏移攝將士解補占留支用刑獄等  
動須稟奉不得自專雖有政能無所施設選置長吏將何  
責成宜委御史臺及出使郎官御史嚴加察訪廉使奏聽  
進止本判官不能規正及刺史不守朝章並量加貶降若  
所管州郡控接蕃夷軍戎之閒事資節制即不在此限

授溫造山南西道節度等使詔

漢水上游梁山東險控巴岷之道路作咸鎬之藩屏實命  
長帥必惟全才簡求臣僚僉屬邦彥是用築齋壇以賜鉞  
鉞登廉車以察風俗一方之事悉以咨之大中大夫守尚

書右丞上護軍祁縣開國子食邑五百戶賜紫金魚袋溫  
造風度端雅質量閎厚立朝正色直道當官自登周行藹  
有休稱前在憲府爰持國綱人所未能心已獨至聽言盡  
主於忠信指事必根於理化豈彼嘗意自謂知人洎南宮  
提領右轄郎曹承式體要宏通屬聞漢中撫事多故非寬  
仁不可以理軍旅非廉實不可以輯編氓擇任之時誠異  
他日繇是命爾尹正褻國節制梁川首列侍從之臣秩遷  
御史之率至若革故弊以存遠略因其事以定衆心姑務  
載安勿使告病弛張威惠在爾能之勗哉惟勤無忝我推

穀之命可檢校右散騎常侍兼興元尹御史大夫充山南  
西道節度管内觀察處置等使

答路隨等上憲宗實錄詔

卿學貫六經究春秋之微旨業精五典得簡冊之精華編  
年紀述於皇猷記事備陳於王業垂堯言而可法彰禹績  
而有光極思盡誠宣我祖德閱覽之際虔感彌深賜監修  
國史路隨及見在史官司封郎中蘇景允起居舍人陳夷  
行屯田員外郎李漢右拾遺蔣係各錦綵銀器有差

崇儉詔



蓋儉以足用令出惟行著在前經斯爲理本朕自臨四海  
憫元元之久困日昃忘食宵興疚懷躬絕文繡之飾尚愧  
茅茨之儉亦喻卿士形於詔條如聞積習流弊餘風未革  
車服第室相高以華靡之制資用貨寶固啟於貪冒之源  
有司不禁侈俗滋扇是朕之教導未敷使兆庶昧於恥尚  
也其何以足用行令臻於至理歟永念慚歎迨茲申勅自  
今內外班列職位之士其各務樸素宏茲國風有僭差尤  
甚者御史列上主者宣示中外知朕意焉

令御史疏決繫囚詔

如聞時稼甚滋人心望歲近者時雨稍乏憂懷載深慮有留獄致傷和氣應京城諸司見禁囚徒宜令御史臺選清強御史二人各就司䟽決處分具輕重以聞

禁弋獵傷田苗詔

春夏之交稼穡方茂永念東作其勤如傷況時屬陽和令禁麝卵所以保茲懷生仁遂物性如聞京畿之內及關輔近地或有豪家特務弋獵放縱鷹犬頗傷田苗宜令長吏切加禁察有敢違令者捕繫以聞

糾舉滯獄詔

如聞御史臺大理寺京兆府及諸縣囚徒近日訊鞠例多停滯自今已後宜令所司速詳決處分其諸司應推獄有稽緩稍甚與奪或乖者仍委尚書左右丞及分察御史糾舉以聞

加裴度司徒詔

昔漢以孔光降置几之詔晉以鄭沖申奉冊之命雖優隆耆德顯重元臣而議政不及於咨詢用禮止在於安逸朕勤求至理所寶惟賢顧謏舊勞敢不加敬繇是委宰制於大政釋參決於繁務時因聽斷誠望弼諧遷秩上公式是

殊寵特進守司徒兼門下侍郎同中書門下平章事充集  
賢殿大學士上柱國晉國公食邑三千戶食實封三百戶  
裴度稟河嶽之英靈受乾坤之間氣珪璋特達城府洞開  
外茂九功內苞一德器爲社稷之鎮才實邦國之楨故能  
祇事累朝宣融景化在憲宗時掃滌區宇爾則有出軍殄  
寇之勲在穆宗時混同文軌爾則有參戎入輔之績在敬  
宗時阜康兆庶爾則有活國庇人之勤迨弼朕躬總齊方  
夏爾則有弔伐底寧之力皆不遺廟算布在簡編功利及  
人不可悉數而朝論益重我心實知方用臯陶之謨適值

留侯之疾瀝懇牢讓備列於奏章塞詔上言動形於言色  
果聞勿藥之喜更俟調鼎之功而體力未和音容尚阻不  
有優崇之命孰彰寵待之恩宜其協贊機衡宏敷教典論  
道而儀刑卿士宣德而鎮撫華夷嗇養精神保綏福履爲  
國元老毗予一人可司徒平章軍國重事待疾損日每三  
日五日一度入中書散官勲封實封如故

答裴度奏辭冊禮詔

裴度上獻表章固辭冊禮沖謙之志發自懇誠嘉歎良深  
用依來請其冊禮宜權停

令神策軍與府縣協捕寇賊詔

如聞近日京城頻有寇賊府縣所繇至少防制實難須假軍司共爲捕察宜令左右神策各差人與府縣計會如有盜賊同力追擒仍具所差人數姓名并所配防界牒報京兆府應捕獲賊並先送府縣推問如有諸軍諸使勘驗知情狀如實是殺人及強盜罪跡分明不計贓之多少聞奏訖牒報本司便付京兆府決殺其餘即各牒送本司令準百姓例之罪科決待府司添補所繇人力稍足即別條流其外縣有軍鎮處亦準此處分

欽定全唐文

卷七十一

文宗

九

勅禮部侍郎高鋹試宗正寺解送人詔

夫宗子維城本枝百代封爵便宜無令廢絕常年宗正寺  
解送人恐有浮薄以忝科名在卿精揀藝能勿妨賢路其  
所試賦則準常規詩則依齊梁體格